



Received: 2021-06-08

Accepted: 2021-07-08

Published: 2021-08-31

Original Article

Pornografi Dalam Kalangan Remaja Generasi Z Menurut Perspektif Islam

Pornography Among Z Generation Adolescents From The Islamic Perspective

Nor Azrina @ Nor Azura Ab. Rahman ^{a*} Tengku Maaidah Tengku A. Razak ^a, Nik Nurul Akmal Ab. Alim ^a, Nur Kamilah Kamaruddin ^a, Najahudin Lateh ^b & Nurhidayah Hashim ^b

^a Academy of Contemporary Islamic Studies, Center of Foundation Studies, University Technology MARA

^b Academy of Contemporary Islamic Studies, University Technology MARA

* Corresponding author, email; norazrina.abrahman@uitm.edu.my

ABSTRACT

Pornografi telah menjadi satu ancaman kepada kesejahteraan masyarakat di negara ini. Rentetan daripada Perintah Kawalan Pergerakan akibat pandemik COVID-19 penglibatan remaja terhadap internet menjadi semakin meningkat dan tidak terkawal sehingga terdapat remaja yang terjebak ke dalam aktiviti pornografi. Tujuan kajian ini dilakukan adalah untuk mendapatkan maklumat berkaitan gejala pornografi dalam kalangan generasi Z dan ancaman pornografi dari aspek sosial kepada manusia. Metodologi kajian ini adalah berbentuk kualitatif iaitu menggunakan kaedah analisis dokumen dengan memilih artikel-artikel berkaitan kes pornografi, statistik salah laku jenayah seksual, laman sesawang berkaitan pornografi dan teks-teks al-Quran. Hasil kajian mendapati gejala pornografi ini semakin meningkat malah mempengaruhi akhlak dan pemikiran manusia terutama dalam kalangan remaja berusia dalam lingkungan 11 hingga 22 tahun. Pengkaji turut mendapati terdapat langkah-langkah penyelesaian yang telah digariskan di dalam teks-teks al-Quran. Menyedari bahaya pornografi kepada masyarakat khususnya remaja, langkah menanganinya perlu dilaksanakan sebelum ia menjadi satu ketagihan yang sukar dirawat.

Keywords: Media Sosial, Ketagihan, Internet, Remaja, Implikasi Negatif.

Pendahuluan

Gejala pornografi telah menjadi isu hangat dalam kalangan masyarakat di negara ini. Perintah Kawalan Pergerakan akibat wabak COVID-19 yang telah berjalan sejak 18 Mac 2020 lalu telah menyebabkan para remaja terpaksa menggunakan internet sebagai medium pembelajaran secara atas talian. Keadaan ini telah membuka ruang yang besar kepada keterlibatan remaja

dalam dunia internet. Tanpa kawalan diri dan pemantauan ibu bapa, anak-anak remaja ini pasti akan terjerumus dalam gejala tidak sihat seperti aktiviti pornografi dan sebagainya.

Aktiviti pornografi yang berlaku di negara ini tidak sahaja melibatkan golongan dewasa malah turut melibatkan golongan remaja yang merupakan individu yang diharapkan menjadi pelapis kepimpinan negara. Ancaman pornografi di media-media internet dan gajet sangat merisaukan kita dan perlu diberi perhatian sewajarnya oleh pelbagai pihak. Peranan ibu bapa di rumah sangatlah penting bagi memantau aktiviti harian anak-anak. Apatah lagi dalam tempoh perintah kawalan pergerakan yang menyebabkan anak-anak terpaksa berada di rumah dan meneruskan pembelajaran secara atas talian. Peluang dan ruang masa agak luas tersedia untuk mereka mengakses laman sesawang. Ibu bapa perlu peka dan sentiasa memantau aktiviti anak-anak di rumah.

Di Sweden, satu kajian telah dilakukan oleh sekumpulan penyelidik bagi mengenalpasti aktiviti pornografi yang berlaku dalam kalangan pelajar remaja dan mendapati ia telah menjadi sebahagian daripada rutin seharian remaja ini. Sebanyak 96 peratus daripada responden pelajar lelaki terlibat dalam aktiviti ini berbanding 54 peratus daripada pelajar perempuan. Kumpulan penyelidik ini telah mencadangkan agar pendidikan seksualiti diterapkan dalam kurikulum pendidikan di sekolah¹.

Masyarakat pada masa sekarang menganggap pornografi adalah suatu perkara biasa dan menjadi hobi serta hiburan ketika mengisi masa lapang. Ada yang menganggap ia adalah hak privasi seseorang individu. Tanpa disedari kegemaran menonton pornografi akhirnya membawa kesan yang negatif kepada individu tersebut dan juga masyarakat.

Bagi menangani jenayah yang melibatkan aktiviti pornografi kanak-kanak secara atas talian, Polis Diraja Malaysia (PDRM) dengan kerjasama Suruhanjaya Komunikasi Multimedia Malaysia telah menubuhkan Unit Siasatan Jenayah Internet Terhadap Kanak-kanak (MICAC). Unit ini bertanggungjawab menjalankan siasatan jenayah pornografi kanak-kanak yang dilakukan secara atas talian selain memantau penggunaan trafik laman sesawang yang berunsur lucah. Kelengkapan peralatan canggih membolehkan mereka mengesan kekerapan penggunaan trafik laman sesawang oleh pengguna internet dan kandungan bahan pornografi yang dimuat naik serta dimuat turun oleh pengguna. Data-data ini menjadi bukti kukuh untuk mengesan jenayah siber bagi tujuan pendakwaan².

Metodologi Kajian

Metodologi yang digunakan dalam kajian ini adalah berbentuk kualitatif dengan menggunakan kaedah analisis dokumen. Data-data yang dikumpul telah didokumentasikan dan bagi mendapatkan maklumat berkaitan topik yang dibincang serta dianalisis untuk mendapatkan

¹ Magdalena Mattebo et.al. "Pornography and Sexual Experiences Among High School Students in Sweden." *Journal of Development Behavioral Pediatric*, vol. 3, 2014.

² Penyata Rasmi Parlimen Bil. 40, Parlimen Keempat Belas, Penggal ketiga, Mesyuarat Ketiga, 26 November 2020 : 3

kesimpulan kajian. Dokumen adalah sumber yang paling mudah kepada pengkaji kerana maklumat yang diperlukan telah sedia ada dan mempunyai tahap kesahan yang tidak diragui³.

Dalam kajian ini pengkaji menjalankan kajian kepustakaan bagi mendapatkan maklumat berkaitan pornografi, statistik salah laku jenayah seksual, laman sesawang berkaitan pornografi dan teks-teks al-Quran. Data ini penting bagi mengesahkan hipotesis pengkaji, bahawa kebanyakan kes jenayah dan salah laku seksual adalah berpunca daripada elemen pornografi. Pengkaji turut menetapkan hipotesis kedua bahawa terdapat langkah penyelesaian dalam teks-teks al-Quran. Data-data ini kemudiannya dianalisis dan diolah bagi menghasilkan dapatan kajian dan kesimpulan.

Objektif Kajian

Kajian ini adalah bertujuan mendapatkan maklumat berkaitan gejala pornografi dalam kalangan generasi Z dan mengenalpasti ancaman pornografi dari aspek sosial kepada manusia. Perbincangan menurut pandangan Islam turut diutarakan bagi mengupas secara ringkas tentang isu pornografi. Topik ini dilihat signifikan kerana ia merupakan isu utama yang diperbincang pada masa kini apatah lagi dengan pelaksanaan Perintah Kawalan Pergerakan akibat Pandemik Covid 19 yang menyebabkan orang ramai terpaksa berkurung di rumah. Isu ini juga dilihat penting kerana ia membabitkan golongan remaja sebagai generasi yang akan mencorakkan hala tuju negara pada masa hadapan. Generasi ini diharapkan dapat dibentuk menjadi insan yang sejahtera dan seimbang dari aspek pembangunan jasmani, emosi, rohani dan keintelektualan sehingga mampu memberi sumbangan kepada negara.

Kajian-Kajian Lepas

Satu tinjauan pendapat dilakukan oleh Lembaga Penduduk dan Pembangunan Keluarga Negara (LPPKN) di Lembah Klang mendapati, 78.3 peratus ibu bapa membenarkan anak-anak memiliki gajet⁴. Dalam satu kajian yang dijalankan pada tahun 2000 telah mendedahkan bahawa terdapat 80 000 laman sesawang berunsur pornografi telah dihasilkan antara tahun 1999 hingga tahun 2000. Sebanyak 200 laman web pornografi dibangunkan setiap hari pada ketika itu⁵. Pengkaji menjangkakan angka ini sudah pasti berganda dengan kehadiran pelbagai peralatan teknologi yang lebih canggih pada hari ini. Apatah lagi pornografi kini telah berevolusi menjadi sumber komersial dalam bidang industri.

Menurut penyelidikan Forrester, pendapatan yang diperolehi oleh industri pornografi secara online meningkat sebanyak 30% dan bernilai lebih daripada USD1 bilion. Di Jepun pula terdapat lebih kurang 3,000 atau 30% laman web pornografi kanak-kanak. Apabila internet mula

³ Kamarul Azmi Jasmi. "Metodologi Pengumpulan Data dalam Penyelidikan Kualitatif." *Kursus Penyelidikan Kualitatif Siri 1 2012 at Puteri Resort Melaka on 28-29 Mac 2012*. Melaka: Institut Pendidikan Guru Malaysia Kampus Temenggong Ibrahim, 2012: 1-14.

⁴ Mohd Nasaruddin Parzi. "Pengaruh Gajet Terhadap Kanak-Kanak Membimbangkan." *BH Online*, 27 November 2019.

⁵ Shaikh Mohd Saifuddin. "Memahami Islam Melalui Teknologi Maklumat dan Komunikasi." Kuala Lumpur: Institut Kefahaman Islam Malaysia (IKIM), 2000, 19-21.

dilancarkan di Jepun lebih 80% daripada kunjungan yang dibuat di Internet adalah tertumpu kepada laman-laman web pornografi ⁶. Negara Malaysia telah menduduki tempat keempat tertinggi di dunia dalam statistik penggunaan trafik Pornhub. Penggunaan trafik Pornhub meningkat sebanyak 84% sepanjang tempoh wabak COVID-19 ⁷.

Analisis terkini sehingga November 2020 daripada SimilarWeb telah mendedahkan statistik akses laman sesawang tertinggi di dunia. Tiga daripada sepuluh akses adalah laman sesawang pornografi. Kajian daripada BBFC pada tahun 2020 telah melaporkan statistik remaja yang terdedah kepada pornografi. Taburan peratus penglibatan remaja dalam aktiviti pornografi adalah sebagaimana berikut; 51 peratus remaja yang berumur antara 11 hingga 13 tahun, 66 peratus remaja berumur antara 14 hingga 15 tahun dan 79 peratus remaja berumur antara 16 hingga 17 tahun ⁸.

Kajian Penduduk dan Keluarga Malaysia Kelima (KPKM-5) telah dijalankan oleh LPPKN pada tahun 2014 menjelaskan bahawa 35.3 peratus remaja Malaysia telah terdedah kepada bahan pornografi. Sumber utama pemerolehan bahan lucah adalah daripada sumber internet dengan angka 60.8 peratus selain telefon pintar, Video CD dan bahan bercetak. Hasil kajian ini turut mendapati bahawa risiko terdedah kepada bahan pornografi lebih tertumpu kepada kumpulan remaja yang berumur antara 18 hingga 24 tahun berbanding remaja berumur 13 hingga 17 tahun⁹.

Kaji Selidik Tinjauan Kesihatan dan Morbiditi Kebangsaan 2017 yang dijalankan ke atas 27,455 remaja sekolah menengah mendapati 6 daripada 7 remaja merupakan pengguna internet aktif manakala 2 daripada 7 remaja telah mengalami ketagihan internet. Peratus ketagihan internet dalam kalangan remaja sekolah menengah didapati semakin meningkat dari pelajar tingkatan satu hingga tingkatan lima. Sebanyak 38 peratus pelajar tingkatan lima telah mengalami ketagihan internet. Manakala, peratus ketagihan internet paling tinggi adalah dari kalangan etnik Cina iaitu sebanyak 34 peratus¹⁰. Kajian ini turut mendedahkan bahawa populasi pelajar yang bersekolah di kawasan bandar mempunyai peratus ketagihan internet yang lebih tinggi berbanding luar bandar. Telefon pintar pula telah menjadi gajet utama yang diminati oleh mereka yang mengalami ketagihan internet dengan jumlah sebanyak 94.4 peratus diikuti oleh komputer riba dan tablet¹¹.

⁶ Ibid.

⁷ TechNaveBM. *"Trafik Pornhub di Malaysia Meningkat Sehingga 84% Sepanjang Wabak COVID-19, Ke-4 Tertinggi di Dunia"* Accessed Mac 19, 2020.

⁸ Fight The New Drugs. *"20 Must-Know Stats About The Porn Industry And Its Underage Consumers."* 4 December 2020.

⁹ Lembaga Penduduk dan Pembangunan Keluarga Negara. *"Laporan Kajian Penduduk dan Keluarga Malaysia Kelima (KPKM-5)." 2014: 50*

¹⁰ S. Maria Awaluddin et.al. *"National Health and Morbidity Survey (NHMS) 2017: Key Findings from the Adolescent Health and Nutrition Surveys."* National Institute of Health, Ministry of Health Malaysia, April 2018: 7

¹¹ S. Maria Awaluddin et.al *"National Health and Morbidity Survey (NHMS) 2017: Adolescent Health Survey 2017."* Institute for Public Health, Ministry of Health Malaysia, 2017 : 95

Statistik yang telah dipaparkan ini jelas menunjukkan kepada kita bahawa anak-anak remaja secara globalnya sedang diancam dengan pornografi. Sekalipun ia tidak tampil seumpama bencana yang menakutkan namun implikasi daripadanya akan mendatangkan keburukan dan musibah kepada masyarakat dan negara. Kesan daripada itu akan meningkatkan statistik jenayah seksual, kelahiran anak tidak sah taraf, kecelaruan gender, kemusnahan institusi keluarga, kerapuhan institusi sosial manusia dan sebagainya.

Remaja Generasi Z

Gen Z atau Generasi Z merupakan generasi yang dilahirkan antara tahun 1998 hingga 2009. Generasi ini membesar dalam dunia teknologi digital dan perkembangan media yang sangat pantas. Selain daripada itu mereka adalah remaja yang dibesarkan dalam dimensi kehidupan yang penuh dengan cabaran. Mereka diperlihatkan dengan insiden keganasan, pengaruh gejala sosial, kes-kes jenayah dan sebagainya secara langsung mahupun tidak langsung melalui sumber media.

Kepesatan perkembangan teknologi masa kini telah menjadi satu kelebihan kepada remaja Generasi Z. Kemahiran dalam menggunakan teknologi menyebabkan mereka mudah berhubung dengan individu di seluruh pelusuk dunia tanpa had dan batasan. Dunia internet dan media sosial menjadi sahabat karib mereka. Malah, ada yang mampu menjana pendapatan sampingan melalui dunia internet dengan menggunakan aplikasi telefon pintar dan sebagainya. Oleh sebab itu, Generasi Z juga telah dikenali sebagai *iGeneration*, generasi internet atau generasi net¹².

Don Tapscott (1999) di dalam kajiannya yang terkandung dalam buku; '*Growing Up Digital: The Rise of the Net Generation*' telah memperkenalkan fasa-fasa generasi¹³. Bagi mengupas topik ini, pengkaji memberi perhatian kepada ciri-ciri generasi Z agar hubungan antara generasi ini dengan dunia siber dapat dilihat dengan lebih jelas. Kajian yang dilakukan oleh Diana G. Oblinger dan James L. Oblinger (2005) mendapati ciri-ciri generasi Z adalah sebagaimana berikut¹⁴ :

1. Dikenali sebagai generasi internet, generasi net atau generasi platinum.
2. Celik digital iaitu kemampuan menggunakan pelbagai kemahiran teknologi digital dan visual. Mereka ini lebih menyukai bentuk visual berbanding teks.
3. Gemar bersosial melalui aplikasi media sosial seperti *whatsapp*, *Instagram*, *twitter*, *Facebook* dan sebagainya.
4. Generasi yang pantas dan mahir mencari maklumat dalam dunia digital. Meskipun demikian, kecenderungan mereka kepada kepantasan mencari maklumat di internet adakalanya menyebabkan pengabaian aspek ketepatan maklumat dan kesahihannya.
5. Tidak suka diarah, diberitahu atau mendengar cerita. Mereka lebih suka meneroka sesuatu pengalaman dengan sendiri.

¹² Fariza Md. Sham. "*Generasi Z dan Isu Perpaduan*." Bangi: ICIP Universiti Kebangsaan Malaysia, 2017: 14.

¹³ Ibid : 14-15

¹⁴ Diana G. Oblinger & James L. Oblinger. "*Is It Age or IT: First Steps Toward Understanding the Net Generation*." In *Educating the Net Generation*, by Diana G. Oblinger & James L. Oblinger, North Carolina: Educause, 2005, 2.5-2.7.

6. Mempunyai jaringan sosial yang luas. Generasi ini gemar berhubung sekalipun tidak mengenali antara satu sama lain. Mereka juga suka bermain permainan dalam talian, memuatkan gambar aktiviti seharian untuk tatapan umum dan lain-lain lagi.
7. Cenderung kepada visual dan kinestetik. Generasi Z lebih menyukai petunjuk visual yang mudah difahami berbanding membaca teks yang panjang dalam memahami sesuatu arahan atau pengetahuan.

Ternyata Generasi Z adalah satu kelompok generasi yang sangat berbeza dari segi minat, kemahiran, pemikiran, tingkah laku dan tindakan. Mereka mempunyai karakter tersendiri kesan daripada pengaruh teknologi dan media sosial yang telah membentuk psikologi dan pemikiran generasi ini. Remaja generasi Z sangat obses dengan media sosial hingga menyebabkan mereka leka dengan gajet, suka bersendirian dan kurang berkomunikasi secara langsung dengan orang di sekeliling mereka. Mereka mempunyai rangkaian rakan dari seluruh dunia sekalipun mereka tidak mengenali latar belakang rakan sosial tersebut. Situasi ini turut memberi kesan kepada nilai yang menjadi pegangan mereka. Mereka tidak lagi terikat dengan nilai tradisi dan norma yang telah diterapkan oleh masyarakat sekeliling mahupun ibu bapa mereka¹⁵.

Melihat kepada ciri-ciri dan karakter generasi Z, kita tidak mungkin dapat memisahkan mereka dengan dunia siber kerana generasi ini dilahirkan dalam fasa perkembangan teknologi maklumat yang pesat. Kerisauan masyarakat dapat dirasakan kerana dunia siber yang dikatakan sinonim dengan golongan remaja merupakan penyumbang utama pornografi. Justeru, pendidikan yang sesuai perlu disediakan kepada golongan ini. Para remaja ini perlu diberi kesedaran tentang bahaya pornografi agar mereka tidak menggunakan gajet dan internet pada perkara yang menyalahi undang-undang kemanusiaan mahupun undang-undang keagamaan.

Ancaman Pornografi Kepada Generasi Z

Pornografi adalah perkataan yang boleh mewakili idea seksual secara terbuka atau terang-terangan melalui lukisan atau tulisan. Laman-laman web pornografi ini mempersembahkan segala perilaku seks sama ada secara normal atau tidak normal mengikut citarasa yang pernah diketahui manusia¹⁶. Pornografi juga seerti dengan perkataan erotik yang bermaksud membangkitkan nafsu syahwat, mengghairahkan atau memberahikan¹⁷. Ia merupakan suatu perbuatan yang dianggap melanggar nilai moral seperti mendedah atau menunjukkan aurat secara keterlaluan sehingga mampu mendatangkan ghairah (menaikkan nafsu) kepada mereka yang melihatnya¹⁸.

¹⁵ Fariza Md. Sham. *"Generasi Z dan Isu Perpaduan."* Bangi: ICIP, Universiti Kebangsaan Malaysia, 2017.

¹⁶ Nor Azah Abdul Aziz. *"Internet, Laman Web Pornografi dan Kaedah Psikospiritual Islam Dalam Menangani Keruntuhan Akhlak Remaja Pelayar Laman Web Pornografi."* *Jurnal Usuluddin*, 29, 2009 : 147–159.

¹⁷ Noresah Baharom et. al. *Kamus Dewan, Edisi 3*. Kuala Lumpur: Dewan Bahasa dan Pustaka, 2002.

¹⁸ Amirul Ashraaf Norman dan Nooraini Othman. *"Ketagihan Pornografi Dalam Kalangan Remaja : Faktor dan Implikasi Terhadap Sahsiah Diri Remaja."* *Jurnal Melayu*, , 2020, 205-215.

Ramai ibu bapa tidak menyangka anak-anak mereka berani membuka laman sesawang porno kerana kurang peka terhadap ancaman pornografi serta tidak memahami perkembangan seksual anak-anak mereka. Perkembangan seksual bukan hanya melibatkan perilaku pemuasan seks semata, tetapi juga mencakupi pembentukan nilai, sikap, perasaan, identiti, interaksi dan perilaku seseorang individu¹⁹.

Ketika anak menjalani perkembangan seksualnya, mereka tidak berfikir tentang seks seperti orang dewasa. Pada fasa ini pemikiran anak-anak tentang perkembangan seksual adalah menyentuh aspek emosi, sosial, budaya dan fizikal. Bimbingan ibu bapa sangat perlu pada ketika ini bagi menjelaskan kepada anak-anak tentang perkara yang betul dan salah dalam proses perkembangan seksualnya. Apa yang anak pelajari, fikir dan rasakan mengenai seks akan membentuk sikap dan perilaku seksnya dalam kehidupannya pada masa akan datang. Justeru, ibu bapa perlu memahami dan membantu anak-anak agar proses perkembangan seksual mereka berjalan secara sihat dan terbimbing²⁰.

Kajian kepustakaan mendapati pornografi menyebabkan masyarakat terdedah kepada ancaman keselamatan yang berpunca daripada jenayah seksual seperti rogol, cabul, pedofilia, parafilia dan sebagainya. Kita sering mendengar isu jenayah seksual dilaporkan di dada akhbar yang melibatkan kes rogol, cabul dan pedofilia. Malah pelaku jenayah seksual ini boleh terdorong kepada tahap membunuh mangsanya. Kesan daripada aktiviti pornografi juga mampu mendorong seseorang individu melakukan perlakuan seksual seperti masturbasi, zina dan sumbang mahram. Apa yang menyedihkan implikasi negatif daripada salah laku ini membawa kepada kehamilan luar nikah, pembuangan bayi serta penularan penyakit kelamin seperti HIV, AIDS dan sebagainya.

Pada tahun 2018, PDRM telah melaporkan sebanyak 1921 kes yang melibatkan penderaan seksual kanak-kanak. Namun data ini telah diragui oleh Interpol kerana masih banyak kes yang diarahsiakan kepada pihak berkuasa. Keadaan ini adalah disebabkan faktor budaya asia yang lebih suka berdiam diri dan merahsiakan kejadian jenayah yang berlaku kepada anak-anak mereka kerana dibelenggu dengan rasa malu dan aib²¹.

Laporan Jabatan Kebajikan Masyarakat (2019) hasil kerjasama Polis Diraja Malaysia (PDRM) mencatatkan bahawa rekod statistik kes pembuangan bayi yang diperolehi mencapai angka yang agak tinggi dari tahun 2014 hingga 2018. Sepanjang tempoh tersebut sebanyak 577 kes pembuangan bayi dilaporkan mengikut pecahan berikut; 103 kes pada tahun 2014, 111 kes pada tahun 2015, 115 kes pada tahun 2016, 120 kes pada tahun 2017 dan 128 kes pada tahun 2018. Manakala kehamilan luar nikah yang dilaporkan di lima negeri di Malaysia pada tahun 2016 adalah sebanyak 2720 kes²².

¹⁹ Margareta. "*Perkembangan Seksual Anak Dan Remaja*." Psikologi Forensik dan Psikopatologi, 2 Januari 2016.

²⁰ Ibid.

²¹ Odisi. "*Interpol Ragui Statistik Data Kes 'Child Grooming' di Malaysia*." 9 November 2019.

²² Polis Diraja Malaysia. "*Laporan Statistik Kes Buang Bayi dari 2014 hingga 2018*" 2019.

Jadual 1.1 : Statistik Kes Pembuangan Bayi di Malaysia dari 2014 hingga 2018 (PDRM)

TAHUN	BILANGAN KES PEMBUANGAN BAYI
2014	103 kes
2015	111 kes
2016	115 kes
2017	120 kes
2018	128 kes

Laporan statistik yang dipaparkan sudah cukup membuktikan peningkatan kadar jenayah dan salah laku seksual di negara ini. Melihat kepada kes-kes ini, tidak dapat dinafikan sebahagian besar punca masalah adalah disebabkan hilang kawalan diri yang disokong dengan ancaman pornografi. Lambakan gambar-gambar pornografi yang mudah diakses melalui internet dan gajet menjadikan individu terlibat terdorong untuk bertindak lebih agresif. Bahan pornografi juga turut memberi idea kepada individu terlibat untuk berkelakuan sebagaimana yang dilihat dan ditonton.

Kewujudan aplikasi video dan permainan atas talian yang memaparkan penampilan aksi berunsur seksi turut dilihat sebagai ancaman pornografi kepada kanak-kanak dan remaja. Ia banyak tersebar dalam kalangan masyarakat kini dan digunakan secara meluas seolah-olah tidak dianggap sebagai suatu kesalahan mahupun ancaman. Salah seorang pakar kriminologi di Malaysia menjelaskan bahawa terdapat banyak elemen lucah dalam media sosial di negara ini yang menjadi punca berlakunya kes-kes jenayah seksual. Selain daripada itu, ia dijadikan sebagai satu peluang untuk meraih jumlah pengikut yang ramai oleh pihak-pihak tertentu di media sosial.

Pendedahan kepada bahan-bahan pornografi dalam tempoh tertentu akan menyebabkan otak manusia teransang untuk menghasilkan dopamin yang mencetuskan dorongan tingkahlaku berunsurkan ganjaran. Ia mampu membangkitkan rasa keseronokan melampau diiringi perasaan ingin tahu (inkuiri) hingga menyebabkan seseorang terjerumus kepada dunia fantasi seksual. Tanpa kawalan, seseorang itu akan terdorong untuk melakukan perlakuan seksual malah mampu mempengaruhi seseorang hingga melakukan jenayah seksual.

Pandangan Islam Terhadap Pornografi

Islam telah menjelaskan secara terperinci dalam aspek pendidikan seksual terhadap anak-anak. Antaranya adalah adab berpakaian, adab menutup aurat, adab pergaulan antara lelaki dan perempuan, dan juga adab menjaga pandangan mata daripada melihat perkara mungkar. Al-Quran telah memberi panduan dalam menangani isu pornografi. Surah al-Nur ayat 58 telah menjelaskan tentang larangan memasuki kamar ibu bapa dalam tiga waktu iaitu; sebelum waktu Subuh, sebelum waktu Zohor dan selepas waktu Isyak.

Sebagaimana maksud firman Allah SWT dalam surah al-Nur ayat 58 :

“Wahai orang-orang yang beriman, hendaklah hamba-hamba kamu dan orang-orang yang belum baligh dari kalangan kamu, meminta izin kepada kamu (sebelum masuk ke tempat kamu), dalam tiga masa; (iaitu) sebelum sembahyang subuh, dan ketika kamu membuka pakaian kerana kepanasan tengah hari, dan sesudah sembahyang Isyak; itulah tiga masa bagi kamu (yang biasanya terdedah aurat kamu padanya). Kamu dan mereka tidaklah

bersalah kemudian daripada tiga masa yang tersebut, (kerana mereka) orang-orang yang selalu keluar masuk kepada kamu, dan kamu masing-masing sentiasa berhubung rapat antara satu dengan yang lain. Demikianlah Allah menerangkan kepada kamu ayat-ayatNya (yang menjelaskan hukum-hukumNya); dan (ingatlah) Allah Maha Mengetahui, lagi Maha Bijaksana" (58).

Tiga waktu ini adalah waktu privasi ibu bapa dan waktu mereka sedang sedang berehat di dalam bilik. Pada tiga waktu ini, anak-anak adalah dilarang untuk memasuki kamar ibu bapa. Larangan ini adalah bagi menjaga adab pergaulan, membatasi kebebasan anak-anak dan mengelakkan mereka daripada terlihat sesuatu yang memudaratkan pemikiran. Pandangan yang tidak harus pada anak-anak ini mampu merosakkan persepsi anak-anak terhadap ibu bapa serta menghilangkan rasa hormat terhadap mereka. Anak-anak perlu diajar dari kecil untuk meminta izin masuk ke bilik ibu bapa dengan cara mengetuk pintu bilik dan meminta izin untuk masuk.

Agama Islam telah mengharamkan aktiviti pornografi melalui firman Allah SWT dalam surah An-Nur ayat 30 dan 31 sebagaimana berikut :

"Katakanlah (wahai Muhammad) kepada orang-orang lelaki yang beriman supaya mereka menahan pandangan mereka (daripada memandang yang haram), dan memelihara kehormatan mereka. Yang demikian itu lebih suci bagi mereka; sesungguhnya Allah Amat Mendalam Pengetahuan-Nya tentang apa yang mereka kerjakan" (30).

"Dan katakanlah kepada perempuan-perempuan yang beriman supaya menahan pandangan mereka (daripada memandang yang haram), dan memelihara kehormatan mereka" (31).

Perkataan '*yaghuddhu min absarihim*' dan '*yaghdudna min absarihinna*' menjelaskan tentang kewajipan menahan pandangan daripada melihat perkara yang diharamkan Allah. Menurut pandangan ulama fiqh, penglihatan adalah pintu kepada perbuatan mungkar yang menjadikan hati dan fikiran manusia dipenuhi khayalan, keinginan dan menimbulkan rasa ingin tahu (inkuiri) terhadap sesuatu. Keadaan ini akan menyebabkan seseorang terjatuh ke dalam fitnah, perbuatan zina dan salah laku seks.

Secara implisitnya, ayat ini mengandungi maksud kecaman dan cercaan terhadap orang yang gemar memerhatikan perkara yang diharamkan Allah. Apabila penglihatan secara tidak sengaja jatuh pada sesuatu yang diharamkan, seseorang itu harus segera mengalihkan dan menundukkan pandangannya²³. Menurut pandangan pengkaji, apa yang dibincangkan oleh Prof. Dr Wahbah az-Zuhaili ini termasuklah gambaran-gambaran pornografi yang membangkitkan syahwat manusia dan menjerumuskan manusia ke dalam perbuatan yang boleh mendatangkan keinginan seksual serta mendorong seseorang individu terlibat dalam aktiviti pornografi.

Ayat ini dapat difahami dalam konteks menjaga pandangan mata daripada melihat perkara yang diharamkan serta memelihara kehormatan diri daripada perbuatan yang merosakkan maruah. Pandangan mata yang dibiarkan bebas sudah pasti tidak dapat menahan keinginan

²³ Wahbah az-Zuhaili. *Tafsir al-Munir Jilid 9*, Damascus: Darul Fikr, 2005.

daripada melihat perkara-perkara yang haram. Lantas imej atau gambaran yang dilihat itu akan melekat pada fikiran dan hati. Seterusnya ia akan membentuk keinginan dan khayalan yang panjang. Keadaan ini akan mengakibatkan manusia banyak berangan-angan dan jauh dari mengerjakan kebaikan.

Imej atau gambaran pornografi yang dilihat melalui mata akan melekat pada pemikiran manusia dalam jangka masa yang lama dan sukar dilupakan. Gambaran ini akan berulang-ulang datang dalam pemikiran manusia sehingga mengganggu fokus terhadap aktiviti yang dilakukan. Perkara ini pasti akan menghilangkan fokus belajar dalam kalangan pelajar remaja. Menurut pandangan ulama, sikap menundukkan pandangan daripada perkara yang haram akan dapat membersihkan hati dan mengindahkan akhlak seseorang individu.

Adab-adab yang telah diajarkan di dalam Islam juga perlu diajarkan di sekolah bagi mengukuhkan lagi perkembangan seksual anak-anak. Tidak hanya dijelaskan oleh ibu bapa, para guru juga perlu menekankan adab-adab ini kepada para pelajar melalui kurikulum pendidikan di sekolah. Kesedaran terhadap bahaya pornografi juga perlu disemai dalam diri pelajar melalui kempen-kempen dan aktiviti kesedaran antipornografi dan antipornoaksi.

Kempen pencegahan pornografi dilihat agak kurang diberi perhatian oleh pihak sekolah, pejabat pendidikan daerah dan negeri kerana kesukaran untuk mengesan gejala ini dalam kalangan pelajar. Tambahan lagi, aktiviti seumpama ini seringkali dilakukan secara sembunyi dan tidak dizahirkan kepada orang awam serta ibu bapa. Namun, kegiatan ini berlaku tanpa disedari oleh pihak penjaga. Mereka yang terlibat ini akan berkongsi pengalaman seksual, gambar-gambar porno dan maklumat-maklumat laman sesawang pornografi sesama rakan secara sulit. Adakalanya mereka sama-sama menonton video-video lucah dan menjadikan bahan pornografi sebagai topik perbualan antara mereka. Situasi sebeginilah yang menyukarkan ramai pihak untuk mengenal pasti kewujudan gejala pornografi dalam kalangan remaja pelajar.

Remaja pada zaman ini yang merupakan generasi Z sangat terkesan dengan dunia internet dan gajet sama ada ia dimanfaatkan secara positif mahupun sebaliknya. Justeru, penghayatan nilai integriti perlu disemai dalam diri mereka agar penggunaan media sosial dan gajet dimanfaatkan dengan cara yang betul. Mereka adalah pemimpin masa hadapan yang akan mencorakkan negara pada suatu hari nanti. Sewajarnya, proses pendidikan dan pembentukan watak kepimpinan mereka perlu dipelihara agar tidak tercalar dengan aktiviti yang tidak memberi faedah ini. Menyedari keperluan ini, para guru dan ibu bapa harus diberi pendedahan berkaitan teknik mendekati mereka dan menangani remaja terlibat dengan lebih berkesan.

Hasil Dapatan dan Kesimpulan

Perbincangan artikel ini telah membuktikan bahawa terdapat ancaman pornografi dari aspek sosial terhadap manusia khususnya remaja generasi Z. Ciri-ciri remaja yang sangat dekat dengan dunia internet dan gajet memberi kesimpulan bahawa generasi ini tidak mungkin dapat meninggalkan dunia gajet, media sosial dan internet kerana kehidupan mereka sentiasa dilingkungi oleh teknologi digital ini. Malah, sebahagian besar tugas mereka dalam aktiviti pembelajaran harian dilaksanakan dengan menggunakan internet, gajet dan sebagainya.

Kajian ini turut mengesahkan hipotesis pengkaji bahawa elemen pornografi turut menjadi punca berlakunya kes-kes jenayah dan salah laku seksual. Pengkaji juga mendapati terdapat langkah-langkah penyelesaian telah digariskan di dalam teks-teks al-Quran bagi menangani isu

pornografi. Teks-teks al-Quran ini sewajarnya perlu diambil perhatian dan dihayati oleh semua lapisan masyarakat khususnya mereka yang beragama Islam.

Meskipun dimaklumi pornografi memberi kesan yang negatif dan sangat mudah didapati dari sumber internet, namun usaha untuk memisahkan remaja daripada gajet dan internet adalah sukar malah boleh dikatakan sebagai mustahil. Apa yang mampu dilakukan adalah dengan mendidik mereka agar menggunakan sumber internet dan gajet dengan betul. Mereka perlu diberi kesedaran tentang integriti dan tanggungjawab agar penggunaan media internet tidak disalah guna sehingga membawa kepada gejala pornografi yang akan merosakkan akal, kesihatan fizikal, emosi dan juga akhlak mereka.

Langkah ini perlu dimulai dengan memberikan kefahaman dan kesedaran tentang bahaya penyimpangan seksual dan pornografi sehingga tahap para remaja ini memahami akan kemunculan implikasi kedua akibat daripada perbuatan ini²⁴. Kempen kesedaran memerangi pornografi juga perlu disahut oleh semua pihak dan disusuli dengan tindakan yang sewajarnya.

Rujukan

- Agus Gunawan. *"Pengaruh Kegiatan Matrikulasi Pendidikan Seks Dan Kesadaran Tentang Bahaya Pornografi Terhadap Karakter Peserta Didik."* Tsamrah Al-Fikri, Asosiasi Mahasiswa Program Pascasarjana IAID, 10(1), 2016.
- Amirul Ashraaf Norman dan Nooraini Othman. *"Ketagihan Pornografi dalam Kalangan Remaja : Faktor dan Implikasi Terhadap sahsiah Diri Remaja."* Jurnal Melayu, 2020.
- Diana G. Oblinger & James L. Oblinger. *"Is It Age or IT: First Steps Toward Understanding the Net Generation."* In *Educating the Net Generation*, by Diana G. Oblinger & James L. Oblinger, North Carolina: Educause, 2005.
- Fariza Md. Sham. *"Generasi Z dan Isu Perpaduan."* Bangi: ICIP, Universiti Kebangsaan Malaysia" 2017.
- Fight The New Drugs. *"20 Must-Know Stats About The Porn Industry And Its Underage Consumers."* 4 December 2020.
<https://fightthenewdrug.org/10-porn-stats-that-will-blow-your-mind/>.
- Kamarul Azmi Jasmi. *"Metodologi Pengumpulan Data dalam Penyelidikan Kualitatif."* Kursus Penyelidikan Kualitatif Siri 1 2012 at Puteri Resort Melaka on 28-29 Mac 2012. Melaka: Institut Pendidikan Guru Malaysia Kampus Temenggong Ibrahim, 2012.
- Lembaga Penduduk dan Pembangunan Keluarga Negara. *"Laporan Kajian Penduduk dan Keluarga Malaysia Kellima (KPKM-5)."* 2014.
- Magdalena Mattebo, Tanja Tydén, Elisabet Häggström-Nordin, Kent W Nilsson dan Margareta Larsson *"Pornography and Sexual Experiences Among High School Students in Sweden."* Journal of Development Behavioral Pediatric, vol. 3, 2014.
- Margareta. *"Perkembangan Seksual Anak dan Remaja."* Psikologi Forensik dan Psikopatologi, 2 Januari 2016.

²⁴ Agus Gunawan. *"Pengaruh Kegiatan Matrikulasi Pendidikan Seks Dan Kesadaran Tentang Bahaya Pornografi Terhadap Karakter Peserta Didik."* Tsamrah Al-Fikri, Asosiasi Mahasiswa Program Pascasarjana IAID, 10(1), 2016: 155–172.

- Mohd Nasaruddin Parzi. "Pengaruh Gajet Terhadap Kanak-Kanak Membimbangkan." BH Online, 27 November 2019.
<https://www.bharian.com.my/berita/nasional/2019/11/632517/pengaruh-gajet-terhadap-kanak-kanak-membimbangkan>.
- Nor Azah Abdul Aziz. "Internet, Laman Web Pornografi dan Kaedah Psikospiritual Islam dalam Menangani Keruntuhan Akhlak Remaja Pelayar Laman Web Pornografi." *Jurnal Usuluddin*, 29, 2009 .
- Noresah Baharom et. al. *Kamus Dewan, Edisi 3*. Kuala Lumpur: Dewan Bahasa dan Pustaka. 2002.
- Odisi. "Interpol Ragui Statistik Data Kes 'Child Grooming' Di Malaysia." 9 November 2019.
<https://odisi.my/blog/2019/11/09/interpol-ragui-statistik-kes-child-grooming-di-malaysia/>
- Penyata Rasmi Parlimen Bil. 40, Parlimen Keempat Belas, Penggal ketiga, Mesyuarat Ketiga, 26 November 2020.
- Polis Diraja Malaysia. "Laporan Statistik Kes Buang Bayi dari 2014 hingga 2018." 2019.
- S. Maria Awaluddin et.al "National Health and Morbidity Survey (NHMS) 2017: Adolescent Health Survey 2017." Institute for Public Health, Ministry of Health Malaysia, 2017
- S. Maria Awaluddin et.al. "National Health and Morbidity Survey (NHMS) 2017: Key Findings from the Adolescent Health and Nutrition Surveys." National Institute of Health, Ministry of Health Malaysia, April 2018
- Shaikh Mohd Saifuddin. "Memahami Islam Melalui Teknologi Maklumat dan Komunikasi." Kuala Lumpur: Institut Kefahaman Islam Malaysia (IKIM), 2000.
- TechNaveBM. "Trafik Pornhub di Malaysia Meningkat Sehingga 84% Sepanjang Wabak COVID-19, Ke-4 Tertinggi Di Dunia" Accessed Mac 19, 2020.
<https://bm.technave.com/trafik-pornhub-di-malaysia-meningkat-sehingga-84-sepanjang-wabak-covid-19-menular-6370>
- Wahbah az-Zuhaili. *Tafsir al-Munir Jilid 9*. Damascus: Darul Fikr, 2005.